

PETITIO SECUNDA.

Repugnans est super quod nulla est potentia.

PETITIO TERTIA.

Non posse super ea quæ repugnant, nullam declarat imperfectionem, neque infinitum non esse negat.

PETITIO QUARTA.

Infinitum infinito maius esse non potest.

Propositio ducentesima vigesima secunda.

Quantitates quæ æquales esse non possunt in eodem genere, maius tamen & minus recipiunt, sunt in proportione potestatis.

Com.

Sint propositi duo anguli, gratia exempli, a rectilineus, b verò in circumferentia circuli, qui potest esse maior, & minor rectilineo proposito, & nunquam potest esse æqualis, ut declaratum est supra, dico proportioem b ad a esse potestate, nam ut visum est, potest esse maior & minor, & est maius & minus verè, & idè sunt in eodem genere, & vterque est continua quantitas, igitur in transitu necesse est, ut sint æquales aliquando sed non actu, hoc enim repugnat, igitur potestate.

Propositio ducentesima vigesima tertia.

Quantitates quæ actu æquales esse non possunt, in nulla proportione actu esse possunt.

Com.

Sint duæ quantitates quæ æquales esse non possunt, ut in priore exemplo a & b, dico quod non possunt esse in aliqua proportione in actu, aliter sint in proportione c, & ducatur c in b, fiat d, erunt ergo d & a æquales, quod est contra suppositum, nam supponitur quod nulla quantitas ex genere b sit æqualis a, sed d est ex genere b & æquale a, & idè suppositum non manet, igitur a & b non sunt in aliqua proportione in actu.

Per 9. quinti Elem.

Propositio ducentesima vigesima quarta.

Neque temporis ut imaginamur ipsum esse infinitum, neque æui vitarum proportio vlla est ad tempus quod potestate est, ut potè diem vel mensem.

Com.

Tempus ipsum ut infinitum est, aut in actu est, aut refert quippiam in actu, pars autem temporis solùm est potestate, quia nullum tempus in actu est, neque annus, neque mensis, neque dies, neque hora aut momentum, sed si totum tempus non esset actu, nihil esset actu, neque totum neque partes. Igitur totum tempus, vel aliquid loco eius est actu, partes autem potestate, sed ut visum est proportio infiniti nulla est, & ad

rem quæ actu non est, igitur tempus nullam habet proportionem ad annos neque menses vel dies. Quare qui dicunt, quod mille anni sunt vnus dies, in philosophia errant, secus apud Apostolum, vbi de diuinitate agitur. Ergo anni sunt longum tempus, & dies breues, quia dicuntur in comparatione inter se, & non secundum proportionem ad infinitum. Quia sit infinitum a, & duæ quantitates b maior, & minor, vel ergo proportio a ad b c, est vna vel diuersa, si vna, ergo b c erunt æquales, si maior est ad c quam ad b ergo infinitum est maius infinito, ergo non est infinitum, quod est contra petita.

Per 9. quinti Elem. 4. petiti.

Propositio ducentesima vigesima quinta.

Proportio media non est ex ratione agentis sed patientis.

Proponatur a quantitas, quæ debeat mutari ab virtute quæ non fit in materia, & palà est quod non poterit permu-
tari instanti, quia simul esset, & non esset, ergo repugnaret, neque etiam potest non esse, ut demon-
stratum est in Hyperchen, quia repugnant necessariò & essentia Dei, neque mouetur à certa proportione, quia b caret omni quantitate, ergo nihil ostendit vim ipsius b esse finitam, quod ergo moueatur tardè celeriter paruum magnum, istud contingit totum ex conditionibus a, id est, materiae & quantitatis: velut, gratia exempli, si a esset in vasculo palmi, non posset implere iugerum, & hoc non ostendit vllam imperfectionem in b. Et sicut homines omnes sunt in carcere huius mundi, & tamen videntur esse sibi liberi, & appellant solum illos esse in carcere qui sunt in ergastulo, ita omnis materia, & omnis quantitas habet conditiones, per quas (ut ita dicam) constringitur, & repugnat eas mutari, & idè vitam agunt sine vlla proportione. Quod verò dictum est, supra dictum fuit, per exemplum dictum est, non quia ita sit, sicut ergo quod in aliquo pariete, non sit albitudo, nisi vnus gradus, illa non operabitur nisi per vnum gradum, etiam si calx esset infinite alba, & similiter de luce Solis, ergo omnes mentes mouent sine proportione, & non possunt dici finitæ vel infinite, quia ipsæ sunt expertes omnis quantitatis, imò omnis relationis ad quantitatem, & hoc est quod latuit multos, & maxime propter dictum Philosophi, est ergo omnis operatio iuxta id quod est in materia, & non quod vna mens maiores habeat vires, alia cum non sit in eis neque maius neque minus.

Com.

Per 3. petiti.

Propositio ducentesima vigesima sexta.

Proportio sublimis non consistit in magnitudine, sed ordine iuxta quem differentia est eius quod est ante & post.

Non enim potest esse comparatio iuxta magnitudines motas quoniam vel sunt corpora cœlestia, vel elementaria, elementaria esse

Com.